

**MESYUARAT PERTAMA PENGGAL PERTAMA
DEWAN UNDANGAN NEGERI PULAU PINANG
YANG KEEMPAT BELAS
02 OGOS 2018**

PERKARA : 4(B)(XX)8

**SOALAN BERTULIS OLEH AHLI KAWASAN BUKIT TENGAH
YB. GOOI HSIAO LEUNG**

8. Apakah langkah-langkah yang telah diambil oleh Kerajaan Negeri untuk menyeru Kerajaan Persekutuan untuk segera mengembalikan Pilihan Raya Kerajaan Tempatan seperti yang diperuntukan dalam Perkara 113(4) Perlembagaan Persekutuan.

**YB. JAGDEEP SINGH DEO A/L KARPAL SINGH
MENJAWAB BAGI PIHAK Y.A.B. KETUA MENTERI**

8. Kerajaan Negeri Pulau Pinang telah memulakan inisiatif untuk mengembalikan Pilihan Raya Kerajaan Tempatan seperti yang diperuntukkan dalam Perkara 113(4) Perlembagaan Persekutuan sejak tahun 2009 lagi. Langkah-langkah yang telah diambil adalah seperti berikut :
- (i) Pada 14 Julai 2009, YB Chow Kon Yeow, EXCO Negeri bagi Kerajaan Tempatan dan Pengurusan Trafik, telah menulis surat kepada Kerajaan Persekutuan untuk meminta pilihan raya kerajaan tempatan dimasukkan dalam agenda Majlis Kebangsaan Kerajaan Tempatan. Walau bagaimanapun permintaan ini telah ditolak.
 - (ii) Pada 11 Ogos 2009, Dewan Undangan Negeri telah meluluskan resolusi menyeru pihak Kerajaan Persekutuan untuk mengambil tindakan bagi mengembalikan Pilihan Raya Kerajaan Tempatan, tetapi resolusi ini sekali lagi ditolak.

- (iii) Pada 4 Mac 2010, Kerajaan Negeri telah menulis surat kepada Suruhanjaya Pilihan Raya bagi meminta untuk dijalankan Pilihan Raya Kerajaan Tempatan untuk Majlis Perbandaran Pulau Pinang (MPPP) dan Majlis Perbandaran Seberang Perai (MPSP) di bawah Akta Pilihan Raya Kerajaan Tempatan 1960, tetapi Suruhanjaya Pilihan Raya (SPR) enggan berbuat demikian.
- (iv) Pada 18 Januari 2012, Kerajaan Negeri telah mengecualikan kedua-dua MPPP dan MPSP dari Seksyen 15 Akta Kerajaan Tempatan 1976, yang telah memansuhkan semua peruntukan undang-undang berkaitan Pilihan Raya Kerajaan Tempatan.
- (v) Pada 9 Mei 2012, Dewan Undangan Negeri telah meluluskan Enakmen Pilihanraya Kerajaan Tempatan (Pulau Pinang dan Seberang Perai) 2012 dan memperuntukkan supaya Suruhanjaya Pilihan Raya mengadakan Pilihan Raya Kerajaan Tempatan.
- (vi) Pada 18 Disember 2012, Kerajaan Negeri telah menulis surat kepada Suruhanjaya Pilihan Raya memaklumkan bahawa Enakmen tersebut akan berkuatkuasa mulai 31 Januari 2013.
- (vii) Pada 14 Ogos 2014, Yang Arif Hakim telah menolak permohonan oleh Kerajaan Negeri Pulau Pinang berhubung keengganan Suruhanjaya Pilihan Raya untuk mengendalikan Pilihan Raya Kerajaan Tempatan di Pulau Pinang dalam kes di Mahkamah Persekutuan iaitu *Government State Of Penang & Anor v. Government Of Malaysia & Anor* [2014] 7 CLJ 861.
- (viii) Yang Arif Hakim Mahkamah Persekutuan memutuskan bahawa Pihak Berkuasa Negeri mempunyai kuasa untuk mengecualikan pemakaian Seksyen 15 Akta Kerajaan Tempatan 1976 (Akta 171). Walau bagaimanapun, isu menggantung Pilihan Raya Kerajaan Tempatan adalah keputusan Majlis Kebangsaan Kerajaan Tempatan dan pengecualian tersebut adalah bertentangan dengan dasar negara. Pengecualian tersebut juga melanggar Perkara 95A (6) dan (7) Perlembagaan Persekutuan dan Kerajaan Negeri

Pulau Pinang telah melebihi bidang kuasanya dalam mengecualikan pemakaian Seksyen 15 Akta 171 tersebut. Selain itu, jika undang-undang negeri itu tidak selaras dengan Undang-Undang Persekutuan, maka Undang-Undang Persekutuan itu adalah mengatasi mengikut Perkara 75 Perlembagaan Persekutuan.

Pada 9 Mei 2018, setelah Pakatan Harapan berjaya membentuk Kerajaan, seiring dengan manifesto Pakatan Harapan, YB Menteri Kementerian Perumahan dan Kerajaan Tempatan dalam sidang media pada 26 Mei 2018 telah mengumumkan bahawa beliau akan memastikan Pilihan Raya Kerajaan Tempatan akan diadakan dalam tempoh 3 tahun lagi dengan mengambil kira Negeri Pulau Pinang dan Selangor sebagai panduan. Malah perkara mengenai Pilihan Raya Kerajaan Tempatan turut dibangkitkan semasa sesi perjumpaan YB Menteri Kementerian Perumahan dan Kerajaan Tempatan bersama delegasi Kerajaan Negeri Pulau Pinang yang diketuai oleh YB EXCO Perumahan, Kerajaan Tempatan dan Perancang Bandar dan Desa Pulau Pinang. Bagi merealisasikan Pilihan Raya Kerajaan Tempatan di seluruh negara, KPKT telah menjemput Bahagian Kerajaan Tempatan Pejabat Setiausaha Kerajaan Negeri Pulau Pinang untuk memberi taklimat mengenai cadangan pelaksanaan Pilihan Raya Kerajaan Tempatan telah diadakan di Kementerian Perumahan dan Kerajaan Tempatan pada 7 Jun 2018. Susulan daripada sesi taklimat tersebut, satu *Focus Group Discussion* telah ditubuh bagi membincangkan dengan terperinci mengenai Pilihan Raya Kerajaan Tempatan. Pihak KPKT juga telah menganjurkan Bengkel Kajian Semula Pindaan Akta Kerajaan Tempatan 1976 (Akta 171) pada 12 Julai 2018 bertempat di Putrajaya. Skop perbincangan dalam bengkel tersebut adalah merangkumi punca kuasa, mekanisme pelaksanaan, implikasi kewangan, penguatkuasaan dan nilai kadar. Perkara ini adalah penting bagi memastikan Pilihan Raya Kerajaan Tempatan dapat dilaksanakan dengan cekap dan berkesan.